

欽定剿平粵匪方略

欽定剿平粵匪方略卷一百八十三 丁巳年

十月初一日 戊申 官文都興阿胡林翼奏言湖北

下游官軍乘勝圍攻九江並進規湖口以聯江
楚兩軍聲勢適接探報知湖口賊船增至數百
號圖援九江九月初七日李續賓楊載福等商
派陸勇由下游襲攻湖口之背水師夾攻於前
密約內湖水師彭玉麟同日大舉李續賓遂調

各營聲言搜勦宿太等縣卽於初七日渡江是
夜四更拔營楊載福亦由水陸直下總管巴依
爾呼蘭等馬隊亦由陸路馳赴八里江岸一帶
初八日水陸各軍齊攻湖口縣附近之七里沖
三街市月臺山等處賊壘水師復上下轟擊焚
奪賊船不下千餘隻至初九日早卡壘盡破李
續賓與楊載福等督勇架梯緣城並將火箭射

入城中適燒該逆火藥局響聲震天滿城皆火
賊衆洞開城門竄逃當將縣城克復其梅家洲
僞城亦經兵勇攻拔我軍分道邀擊追殺二十
餘里斃賊二千餘名燒斃溺斃者不可勝計臣
等查該逆盤踞湖口已將五載今幸埽積年負
固賊窟而外江內湖水師聲息相聯千里江面
一律肅清使潯城之賊援斷路窮實足以伸

天討而快人心再臣胡林翼於克復小池口後暫駐九江營內將勦守事宜籌商周妥旋於九月初一日回省合併陳明奏入

上諭內閣曰賊匪盤踞湖口已及五載現經李續賓等定計水陸夾攻密約內湖水師彭玉麟同日大舉將縣城克復著官文等督飭水陸各軍乘勝進剿克復九江迅掃賊氛以清江面

官文又奏言撫臣胡林翼自外任府道洊升巡撫戎行久歷十載於茲其父胡達源係原任詹事府少詹事母湯氏現年八十三歲勤儉持家依然寒素胡林翼每以家無次丁侍奉與臣談及聲淚俱下而伊母深明大義常以書來勸其盡心報效勿以母老爲念臣查胡林翼戰功卓著此次全境肅清深得其力本年六月間復在

黃州捐廉解交都興阿大營充餉合無仰懇
天恩給予胡林翼三代正一品封典以昭激勸奏入
上諭內閣曰湖北巡撫胡林翼久歷戎行戰功卓著上
年克復武昌業經賞給頭品頂戴茲復在軍營捐廉
助餉著加恩封贈三代正一品以昭優眷

初四日 辛亥 官文奏言記名副都統協領巴揚阿

因在軍營數載積勞成疾請假回省調治其所

帶馬隊已歸入都興阿大營調撥俟其假滿病痊仍飭馳赴前敵以資統帶

同日德興阿翁同書奏言臣等連日圍剿瓜州有難民泅水遁出訊以逆首吳如哮所在或云現在瓜州或云仍回鎮江往來無定等語臣等以高資爲南岸要津先後派撥紅單艇師拖帶等船二十餘隻前往駐紮與土橋陳國泰一軍

相對又以江北陸路兵單而南岸兵力甚厚咨
商和春等借撥步兵三千名渡江暫歸臣等調
遣如不能分撥臣等亦必就現有之兵悉力攻
剿杜其北竄上游浦口地方水陸均有重兵六
合地居腹裏民情尙好臣等已疊飭副都統富
春等嚴密防範又飭觀音門水師緊扼口門使
賊上下不能聯絡昨據水師遊擊彭常宣稟報

金陵賊黨揚言掠船載米大股下援已分飭上游水陸各軍晝夜偵探合力堵剿又焦山水師經和春等調船十隻防堵高資恐下游空虛致賊由東路沿江北竄酌撥一萬四千斤水礮臺一座並紅單船礮臺一座交遊擊石皓督帶前往沙頭江口防守以遏逆氛均奏入報

同日福興奏言廣信一府爲東路緊要門戶臣
於七月間將信城防守料理就緒卽移軍弋陽
原期省中分出西路兵力協助臣東剿之師卽
可進規撫郡乃瑞州克復後該營得勝之師計
有一萬數千名節經臣往返咨催竟未能抽撥
一旅前來以致饒州門戶仍前洞開皖中大股
逆匪於八月十八九日以後竄至饒屬之景德

鎮向樂平萬年一路長驅而南撫建所屬之金
澶兩縣股匪亦分路北犯貴溪縣境九月初四
日該逆由樂平續到一股併入萬年我軍在崇
岡嶺地方截殺幸繞出賊前扼住內犯弋陽隘
口其前股已經竄踞安仁縣城臣一面飛飭知
縣李元度添撥勁勇扼要迎拒以固貴溪西面
一面於弋陽隨營兵勇內再行抽撥精銳截住

弋貴交界之區其貴溪南路金谿上清一帶外
竄之匪已與北路新踞安仁一股聲息相通訊
據生擒賊供該逆實欲合犯貴溪上竄河口鎮
以撲信郡十二日該逆竄至安仁迤東之鷹潭
地方直徧貴溪南界旋分股偷渡北岸盤踞夏
家嶺石鼓嶺一帶臣前將隨營各軍派撥前往
令其併力堵剿詎南路過河之匪與安仁大隊

之賊合而爲一屯紮附近貴城之高石地方李
元度於十七日率師迎勦行至金沙灘遇賊接
仗斃賊約三四百名忽賊橫出一股將各營衝
爲兩截後股之賊遂乘勢撲進我軍且戰且退
回城固守查貴溪一城四面受敵今該逆合股
圍撲實屬危急萬分自安仁被匪占踞省城河
道不通東西隔絕其貴邑以東不但弋陽無險

可守且由此路直通廣信沿河兩岸亦無要隘
可扼況後路景鎮逆匪絡繹而來此次分股突
至者前後六起而其途徑紛歧既可由樂萬一
路直走安貴並可由德興興安徑趨廣信疊據
探報及所訊賊供皆言石逆親帶江皖大夥賊
黨前來猖獗已極我東路兵力止有此數總兵
李定太勦復東鄉一軍前經臣函令就近酌撥

隊伍赴貴協勦亦未能分兵會合現實別無可
調之軍只得就隨營不及千名之衆卽日拔隊
前赴貴溪援勦儻能及早解圍尙屬事機可轉
否則逆勢益張恐截斷我軍歸路徑犯信郡彼
時亦祇得先其所急星馳回顧廣信力保江浙
兩省咽喉以全大局

同日耆齡奏言總兵李定太探知撫州府屬東

鄉縣賊匪加高城牆以圖抗拒我兵該總兵卽
乘其守備未固於八月二十七日自進賢拔營
二十八日至東鄉縣東岡地方駐紮同遊擊李
超羣等察看地勢行至五里排遇放哨賊百餘
人將賊擊退我軍甫經回營賊衆卽至對山窺
伺李定太派隊出擊賊旋遁去當派弁兵前往
撫郡大路多燃望火以作疑兵使郡賊不敢來

援親督各營兵勇五更出隊分路進攻縣城該
逆見我軍四逼遂棄城而逃望許灣金谿遁去
卽於二十九日收復東鄉縣城正擬進攻金谿
等縣旋接探報景德鎮賊匪自樂平擾及萬年
福興所派副將張騰蛟一軍退回弋陽賊衆遂
至安仁駐防安仁之錦字營敗退黃金埠又據
道員彭玉麟稟稱八月二十九日探得逆渠石

達開帶賊數萬上至建德陸續由彭澤湖口都昌竄往饒州景德鎮以趨撫建是此時自景德鎮至安仁賊數甚衆李定太若率全軍進勦安仁則東鄉進賢空虛必爲撫郡賊匪所襲若分派數營前往則兵分力單難當大敵臣與李定太往返札商擬於距東鄉縣城十五里之大橋地方堅築老營俟安仁賊衆過河時半渡擊之

力退該逆內竄之路並抽調長右元字等營前
赴東鄉歸李定太調度策應貴溪弋陽會勦安
仁逆匪一面飛咨福興札飭廣饒九南道沈葆
楨及廣信饒州兩府督率信郡河口弋陽貴溪
饒郡各路防兵同瑞洪親兵營水師嚴密防守
相機截擊臣仍督飭普承堯等率領湘寶各勇
速將阜田巨寇殲除馳赴東路協剿以殄羣醜

均奏入

上命軍機大臣傳諭福興耆齡曰皖省大股逆匪闖入江境糾合撫州匪衆南北夾犯貴溪圍撲縣城並恐由歧路紛竄廣信福興已拔隊前赴該邑援勦自應先就現有兵力迅解貴溪之圍兼顧廣信門戶毋令完善之區被賊竄擾但隨營兵數不及千名防剿兩形不足李定太一軍素稱得力加以此次由耆齡抽

調之勇爲數已多卽可飭令策應貴溪弋陽等處其
普承堯等所統湘寶各勇如卽將阜田賊匪掃蕩亦
可馳赴東路協剿此外省城及西路各兵勇有無可
以抽撥著福興耆齡會商辦理惟不可專顧一隅致
他處或有疏失

耆齡又奏言賊竄新喻縣屬之羅坊普承堯一
軍迎剿失利我軍挫後臨江城賊知有外援日

出苦戰臨軍大營腹背受敵劉長佑等遂定議
併力決戰八月二十三、四、五等日劉長佑蕭啟
江率隊於秧田中亭一帶嚴陣以待援賊不敢
遽前先於黃岡大坪等處連營築壘二十六日
劉長佑督江忠義等水陸並進蕭啟江率楊恆
升等各營由秧田前進逆眾數萬出拒劉長佑
飭各勇一擁向前蕭啟江分隊包抄賊後破前

敵賊營六座賊以馬隊來衝劉長佑率勇擊之
賊乃大潰我軍乘勢進攻連踏賊營四十餘座
賊棄械逃竄我軍追至黃岡殺賊三四人劉
騰鶴率潮勇馳赴助戰亦追斬賊匪多名敗賊
退回羅坊值同知王勳等率勇行抵新喻會同
楊虎臣等所部各勇分路並進乘賊未成列疾
馳分擊斃賊六百餘人直抵羅坊踏毀河濱賊

壘十餘座該逆紛紛潰敗涉水過河溺斃者不可勝計對岸之賊阻水相抗又經各勇礮斃二百餘人賊悉往陂上遁去是日劉長佑等亦派勇赴羅坊追擊至則王勳等已獲勝收隊探聞敗賊均由峽江逃回阜田郡城之賊於二十一至二十七等日疊次出撲均爲水陸各軍併力擊卻擒斬甚多查此次援賊四五萬直抵大坪

連營數十座距郡城二十餘里該郡大營前後
受敵勢極可虞幸劉長佑等不避艱險奮勇決
戰與王勳等湘勇先後兩獲大勝斃匪四五千
人餘賊遠遁俾臨江各營轉危爲安實於西路
全局深有裨益在事人員洵屬卓著勤勞仰懇
逾格恩施先予獎勵以資激勸江西補用道劉長佑請
賞給巴圖魯名號知府蕭啟江請以道員卽選甘肅安

肅道劉于瀉請

賞加鹽運使銜同知王勳請以知府選用此外出力員
弁可否容臣酌量保獎出自

天恩總兵普承堯於賊在阜田時經臣疊催督軍前進
乃頓兵日久始行拔營致賊匪竄至羅坊官軍
失利咎實難辭應請摘去頂戴拔去花翎責令
力圖攻勦以觀後效至敗回阜田之賊尙有三

四萬人且首逆未除難保不復圖窺伺現飭劉騰鶴普承堯會同王勳各軍仍由新喻峽江兩路並進夾攻阜田殄滅羣醜奏入

上諭內閣曰江西補用道劉長佑等在羅坊大坪等處疊獲勝仗前據駱秉章奏報業經降旨准該撫將在此事出力文武員弁擇尤保奏茲據耆齡奏稱劉長佑等不避艱險奮勇決戰與同知王勳等所帶湘勇連

破賊營先後兩獲大勝實屬援勦得力劉長佑著賞
給齊普圖巴圖魯名號知府蕭啟江著以道員卽選
甘肅安肅道劉于涇著賞加鹽運使銜同知王勳著
以知府選用其餘出力員弁仍著耆齡會同駱秉章
酌量保奏總兵普承堯經耆齡疊催進剿乃遷延日
久始行拔營致賊匪竄至羅坊實難辭咎普承堯著
摘去頂戴拔去花翎責令趕緊進攻以觀後效

者齡又奏言查道員王鑫一軍自廣昌回至永
豐本擬先勦新淦再攻吉安因撫建大股逆匪
將犯樂安王鑫不得不先其所急馳赴樂安迎
勦隨於七月初十二十三等日在樂安城下
及泰平林頭等處先後殺賊二萬餘人署廣昌
營都司張騰霄等率領兵勇鄉團進攻南豐焚
賊營三座殺賊四百餘人七月初三日轟斃城

上賊百餘人卽於是夜收復南豐縣城十四日
吉水縣烏江地方股匪二三千人欲撲永豐縣
城王鑫派張運蘭會同知縣章激率勇往擊斃
賊二百餘人十六日傅逆率黨六七千人復由
吉水竄撲永豐張運蘭等設伏於野壟橋奮擊
斃之時王鑫之兄卽選同知王勳帶湘勇前來
助勦適至永豐二十五日督同各軍進勦泰平

山雙源鋪之賊斃匪千餘人王鑫自十三日林頭獲勝後陡患寒熱泄瀉卽在崇仁鳳岡墟醫治嗣因斬丹書在公陂勦匪陣亡樂邑震動王鑫於二十七日扶病趕回樂安縣城次日王勳亦率勇前往公陂之賊聞大兵已至不戰自遁距王鑫旋於八月初四日在樂安病故其所帶之勇臣以卽選同知王勳係王鑫胞兄爲士卒

所信服卽札委接帶此軍值大股逆匪聚集阜田竄伺袁臨二郡王勳率勇取道安福分宜赴新喻會勦嗣接湖南撫臣咨會派委同知張運蘭知縣王開化分帶王鑫舊部仍以王勳暫攝全軍現在新喻一帶勦辦甚爲得力該營屢次勦賊出力人員俟行查到日卽當據實保奏以昭激勸知州銜樂安縣知縣靳丹書勦賊陣亡

應請

飭部照知州例議卹奏入

上諭內閣曰江西廣昌敗匪竄擾樂安公陂地方知州
銜樂安縣知縣靳丹書督勇禦賊因衆寡不敵力竭
捐軀情殊可憫靳丹書著交部照知州陣亡例議卹
同日胡林翼奏言查水師一軍建議於江忠源
創造於曾國藩而整理擴充至近年而始大戰

艦輜重八九百號大小礮位二千尊江漢之師
如雷如霆軍聲不爲不盛惟是出楚入吳風利
不泊卽瓜步金陵均可隨機勦辦其應與吳皖
統兵將帥互相策應之處旣非李續賓楊載福
彭玉麟所能咨商而李續賓楊載福彭玉麟之
落落寡合亦非他省水師所能調遣且軍旅之
事以一而成以二三而敗唐代九節度之師潰

於相州其時名將郭子儀李光弼亦不能免蓋
謀議可資於衆人而決斷須歸於一將此又軍
事之大較矣楊載福彭玉麟經曾國藩拔識於
風塵之中自湘潭出師以至今日久已分爲兩
部卽不能統爲一軍在該員本無不和在兩營
弁勇卽有才力不相上下之勢是該鎮道又不
能互爲統轄查丁憂兵部侍郎曾國藩持躬謹

慎早邀

聖鑒水師將弁皆其舊部吳會形勢阨塞之要尤所留心前請終制蒙

恩暫准曾國藩讀禮家居曷嘗須臾忘天下哉茲幸機勢可乘東南大局時不可失移孝作忠出而任事天下後世將信其忠而必不能責其不孝應

請

飭下會國藩迅速起程由鄂抵潯卽日督同楊載福彭
玉麟李續賓等水陸各軍會同將軍都興阿長
驅東下都興阿忠勤素著馬隊勇敢冠軍素與
南勇將士一力一心必可豫操勝算抑臣更有
請者軍興以來凡官軍所到之處賊必嚴爲之
備我軍銳意仰攻礮石所及徒損精銳積日累
月壯氣潛銷悍賊乘之轉致於敗又賊之詭計

以堅守綴我兵力轉於無兵及兵弱之處狡焉
思逞循是不變將兵日見少而賊日見多矣竊
計以陸師精兵六千人另籌每月船價銀二萬
兩雇民船四百號從水師之後仍帶長夫鍋帳
並二月米糧軍火遇皖南皖北江南有賊之處
隨機雕剿我兵所至皆賊計之所不及防迨聞
警調援我軍卽可迎戰抑或堅守不出我兵亦

可改圖兵到之後賊必設備設備之後兵可還
歸兵歸之日賊必弛備弛備之日兵可再出不
數月而賊技必窮惟是以奇兵雕剿在乎審機
觀變無論南岸北岸江界皖界應

飭帶兵大員覘賊所在不拘守成法不頓兵堅城不爲
鄰省所節制不爲賊情所牽綴動靜之機默存
於心若稍有沾滯兵機必鈍又兵勇之敢戰者

傷亡必多九月初八初九湖口之役水陸中傷
共九百餘員名亟宜調回武漢加意休息以養
士氣仍以精兵調赴下游彌縫其闕更番疊戰
如環無端庶不致拘滯一隅轉誤大局應請以
九江爲老營根本仍以武昌爲換防並糧臺根
本則餉糈不匱而士氣常新庶於討賊機宜大
有裨益愚昧之見如蒙

聖明採擇可否一併

飭下曾國藩議覆施行奏入

上命軍機大臣傳諭胡林翼曰官軍克復小池口湖口縣兩處九江已成孤立之勢卽日攻克水陸大兵自可相機東下惟曾國藩丁憂後已奏派楊載福總統外江內湖水師彭玉麟協同辦理朕因該侍郎懇請終制情詞懇切且江西軍務漸有起色是以令其暫

守禮廬楊載福等統帶水師旣已著有成效自應仍歸該總兵等相機調度以專責成曾國藩離營日久於現在進剿機宜能否確有把握尙未可知若待其赴潯督辦恐有需時日轉懈軍心胡林翼久厯戎行於軍務尙爲熟悉著將省城公事趕緊料理卽行馳赴九江與都興阿楊載福等會商妥辦務使各營將士同心勦力以期迅殄逆氛共膺懋賞該撫奏稱奇

兵雕勦在乎審機請飭帶兵大員覘賊所在不構成
法不爲賊所牽綴等語此係出奇制勝之法現在若
能抽出一軍卽可照此辦理著該撫與官文都興阿
楊載福等商辦正不必待會國藩到楚方能定議也
至受傷兵勇調回休息仍調精兵彌縫其闕亦屬可
行著與官文等一併籌畫辦理

胡林翼又奏言查江西補用直隸州知州劉騰

鴻之父劉象觀長沙府學附生粵匪初犯湖南
卽與羅澤南李續賓等講明鄉守之法並飭其
子弟究心兵略咸豐五年賊踞武漢劉象觀以
老病不能從軍乃命其子劉騰鴻募勇來援六
年四月由鄂省派援江西大小百餘戰戰歿之
日瑞州士民走而哭者數萬人是劉象觀之善
教其子實有合於孝慈則忠之義茲劉騰鴻已

照道員例

賜卹在該故員以書生從戎忠孝大節原無缺憾惟身
歿之日尙無子嗣其胞弟代領其衆仍留江西
軍營老親年高獨居鄉里合無仰懇

天恩賞給其父母正四品封典庶幾海內聞風頑廉懦
立實於聲教有裨奏入

上諭內閣曰江西補用直隸州知州劉騰鴻由湖南募

勇獎勦江西戰功卓著旋因攻克瑞州力戰陣亡業經降旨照道員例優卹著加恩賞給伊父母正四品封典以示朕褒獎忠藎之至意

初五日壬子安徽巡撫福濟壽春鎮總兵鄭魁士

奏言楚北竄回逆首李秀城糾邀潛太桐舒各處踞賊號稱數萬合併捻匪一股由派河直撲廬城一股由巢縣直撲店埠一股由巢縣夏閣

直撲柘臯意在分路突入臣鄭魁士督同廬城
各營進擊派河之賊臣福濟督飭水師戰船進
擊巢湖之賊並分飭總兵吉順進擊夏閣之賊
九月二十一日該逆竄至二十里鋪築壘七座
欲撲廬城臣鄭魁士卽傳令各隊於二十二日
五鼓會齊前進逆衆由數路蠶擁而來先派協
領桂成帶熱河固原大同潛山各兵爲後應臣

鄭魁士卽親督遊擊余成蛟等帶宣化陝安兵
廣克勇由中路進副都統麟瑞等帶吉林馬隊
凱銳勁勇由東路進總兵扎隆武等帶漢中山
東四川兵由西路進該逆恃衆抵撲我軍擊斃
賊擒不下千餘該逆退保巢壘各兵勇愈殺愈
進直抵賊巢臣鄭魁士帶領各軍圍撲賊營全
行踏毀營內之賊無得脫者三河派河各處賊

匪齊赴援應我軍盡力衝殺約斃賊三千餘名
巢縣逆匪勾合湖北竄賊於九月二十日分水
陸兩路進踞夏閣橋東沿河一帶修築木城數
座欲襲柘皋大營臣福濟卽飭吉順派隊迎勦
二十一日我軍馬隊先至楊徐山賊匪迎戰騎
兵將槍箭衝放賊奪路奔回營總烏爾滾布等
當先追殺夏閣劉家橋各賊齊來接應經吉順

等各帶馬步官兵左右擊刺賊衆大敗尙阿布
督兵直逼木城張遇春撲入賊營各軍紛擲火
罐官兵練勇乘勢殺入立將木城四座踏毀餘
賊向東逃逸我軍跟蹤追殺斃賊甚多其水路
賊船見木城攻破卽揚帆而去官軍由岸上追
趕中槍落河者無數守備王聯陞等梟水追殺
奪獲賊船三隻燒燬糧船四隻二十二日該逆

復回竄夏關仍飭吉順帶隊迎擊賊衆狂奔入城卽將夏關賊壘卡館全行埽平前據生擒賊供逆首李秀城約會巢城僞先鋒黃和錦等有由施口進撲撮鎮船廠直攻店埠繞至廬城之謀臣福濟先飭知州黃際昌等迎擊一面派總兵嵩瑞等整備接應九月二十日探明逆船百餘隻分泊湖邊陸路之賊欲往塘口河搭橋內

竄二十一日都司黃國堯紮出施口西向以禦
丙子鋪逆船守備范玉林東向以禦姥山逆船
黃際昌約集團練沿岸助威哨官楊宏勝等帶
三板船十隻南向直擣孤山之賊該逆以戰艇
二十餘列陣抵敵我軍衝鋒而入礮手梁文昭
躍上賊船斬僞將軍楊萬復首級逆船起碇回
竄我軍圍住開礮逆衆情急投水黃國堯等督

同哨官水勇分上賊船擒獲僞指揮陳上林等
多名奪獲逆船十二隻燒燬及沈水者十一隻
嵩瑞等趕帶店埠兵勇前往接應並將陸路援
賊同時擊退旋據探報姥山賊船連夜遁回巢
縣其丙子鋪逆船移泊蔣口二十三日又竄至
塘口河范玉林親率三板十三隻布陣圍剿擊
破賊長龍船一隻該逆紛紛落水各勇乘勢緊

攻逆匪轉柁南竄我軍尾追二十餘里焚燒賊
船五隻奪獲六隻臣等查前次舒廬和州水陸
獲勝欽奉

諭旨准卽查明彙保此次各路大獲勝仗應懇

天恩俯准擇其尤爲出力者併案保奏以資鼓勵

福濟又奏言查提督銜壽春鎮總兵鄭魁士前
因桐城潰退奉

旨摘去頂翎數月以來巡守廬城布置嚴密此次賊捻
合股內竄督率將弁迎勦疊獲勝仗應請

賞還頂翎以獎勤勞而資統率奏入

上諭內閣曰湖北竄回逆匪糾合皖省髮捻各匪分股
竄撲廬城店埠柘皋等處經水陸各軍分路進勦斬
馘逆匪數千將士用命大挫賊鋒鄭魁士著加恩賞
還頂戴花翎其餘出力員弁准其併案擇尤保奏以

示獎勵

初九日丙辰官文都興阿胡林翼奏言臣等於小

池口克復後偵知逆衆固守九江當卽咨行水陸各軍襲取湖口惟該逆盤踞湖口以來拆毀舊城於下鍾山自麓至頂疊石重關築城如帶復於西岸梅家洲堅築僞城掘濠植樹與湖口對峙以通援應八月內湖口賊船將分路進援

九江李續賓楊載福商同內湖水師惠潮嘉道
彭玉麟設計水陸夾擊訂期九月初八日進剿
初七日李續賓令李續宜率營官何紹彩等馬
步各隊攻梅家洲僞城自率湘凱各營渡江揚
言搜剿宿松太湖是夜駐師張家壩四更後潛
率李續燾胡裕發並副右副左中右各營紆曲
繞道伏於湖口後山梁作楫等伏於山麓專俟

水師得手水陸夾擊黎明時彭玉麟派遊擊蘇在位等攻湖口之東遊擊鄧翼升等攻西岸梅家洲賊船參將劉國斌由中路橫排接應賊分兩岸迎拒都司羅勝發中礮陣亡後隊繼進拋擲火彈賊船火起我軍乘勝擒斬焚奪賊卽紛紛投水先是楊載福於初七日派參將孫昌國等以長龍三板分載陸勇虛作聲勢以待接應

自率各營於初八日抵湖口縣派參將萬化林等攻梅家洲賊船參將李朝斌副將李成謀等於下鍾山賊船大幫停泊之處上下夾攻至是會合彭玉麟水師揚帆直進北風大作舟駛如飛兩岸及城賊同時開放大礮各軍鏖戰多時忽陸師由山頂破空而下賊遂大潰我軍以刀斧火炬斷其鐵練偏賊船於崖下計殺斃燒斃

溺斃者二千餘人將船焚奪一盡維時梅家洲
賊船亦焚燬無遺五更時我兵飛火箭入城中
適中火藥瓦石飛空牆壁迸裂賊開城奪路而
出我軍乘勝追殺楊載福彭玉麟水師分道繞
截又殺二千餘名生擒僞總制陳中理等二百
餘名湖口縣城卽日克復梅家洲之賊見湖口
已破不戰而逃李續宜等由閒道繞出賊前聚

而屠之無一遺者十三日楊載福帶外江水師
彭玉麟帶內湖水師又奪彭澤縣賊船數十號
攻破小孤山賊卡江面一律肅清現飭水陸馬
步專注九江以期建瓴東下迅掃妖氛所有戰
功懋著之水陸員弁謹隨摺繕單籲懇

恩施其餘出力員弁兵勇並傷亡將士容分別查明具
奏按察使李續賓等應請

恩施先行分別獎敘都司羅勝發奮勇捐軀實堪憫惻
請照參將例優卹把總胡永和陳長勝均請照
千總例優卹外委易王佐六品軍功彭瑞益彭
雲漢常晉臨敵陣亡均請照把總例優卹奏入

上諭內閣曰湖北水陸各軍克復江西湖口縣城並將
梅家洲賊匪僞城同時攻拔上游江面一律肅清李
續賓等督率諸軍出奇制勝洵屬可嘉布政使銜記

名按察使李續賓著遇有布政使缺出由軍機處提
奏總兵楊載福著遇有提督缺出由軍機處提奏廣
東惠潮嘉道彭玉麟著賞加按察使銜候選知府李
續宜著免選知府以道員選用其在事出力之副將
成大吉著賞給勁勇巴圖魯名號參將胡裕發著賞
給驍勇巴圖魯名號並著免補參將以副將儘先補
用遊擊楊得先李登梗均著免補遊擊以參將儘先

補用並賞加副將銜遊擊李續燾成得升李存漢都
司彭祥瑞均著以參將儘先補用成得升李存漢並
著賞換花翎都司劉坤山著免補都司以遊擊儘先
補用並賞換花翎候補同知直隸州知州唐際盛著
免補本班以知府不論繁簡儘先補用知縣金國琛
著免選知縣以同知直隸州知州遇缺卽選並賞換
花翎訓導梁作楫著免補訓導以知縣留於湖北遇

缺卽補並賞加同知銜參將陳金鼈著以副將儘先補用並賞加總兵銜副將張啟基著賞加總兵銜參將萬化林李朝斌均著以副將儘先補用守備丁泗濱著以都司儘先補用並賞加遊擊銜都司何瑞祥楊明萬均著以遊擊儘先補用並賞加參將銜參將劉國斌著免補參將以副將儘先補用並賞還花翎署遊擊鄧翼升著免升參將以副將儘先補用蘇在

位著以參將仍歸浙江儘先補用都司孫昌國著免
補遊擊以參將儘先選用喻俊明著以參將儘先補
用並賞換花翎都司陳發祥著免升遊擊以參將仍
留湖北儘先補用守備彭大田著免補守備以都司
儘先選用並賞換花翎把總楊雲祥著以守備儘先
選用並賞加都司銜守備曾泗美楊鎮魁均著以都
司儘先選用千總湯定國著免升守備以都司儘先

補用外委郭德山著免補千總以守備儘先補用並
賞戴藍翎文童岳志鵠陳詩懋均著以從九品遇缺
卽選所有陣亡之都司羅勝發著從優照參將例議
卹把總胡永和陳長勝均著從優照千總例議卹外
委易王佐軍功彭瑞益彭雲漢常晉均著從優照把
總例議卹

官文都與阿胡林翼又奏言臣等前奉

諭旨以李孟羣營盤暫退河西令臣等撥兵協助伏思
鄂皖近在鄰封清除皖逆卽所以保楚疆臣等
未敢稍分畛域現在馬步兵勇進駐宿太者數
千人爲李孟羣後路聲援卽爲進攻六安之計
臣等體察楚軍緩急一面飛函諄致勝保以正
陽克復後或可移師六安與李孟羣會合進攻
昨接勝保覆函知已派馬隊二百名馳赴李孟

羣軍前策應並分軍至六安南路李孟羣亦進
紮六安東門是刻下兵力較厚攻剿可期得手
而楚北現攻九江情形喫緊一經克復卽可廣
集兵力先清皖省北路水師礮船據長江之險
會合東征兼援江省方不至有顧此失彼之虞
現仍令進駐宿太之馬步各軍節節掃蕩乘勝
馳剿與李孟羣軍營相爲犄角以振軍威

官文都興阿胡林翼又奏言小池口克復後臣
都興阿當卽分兵駐守一面分撥馬步兵勇進
剿宿太連日偵知安慶桐城潛山來賊萬餘盤
踞太湖已分股竄至楓香驛涼亭河一帶又宿
松一路亦有石牌賊匪數千竄至桃花鋪乘我
軍營壘未就意圖乘虛攻撲擾及蘄黃邊界而
涼亭河距我師進紮之二郎河僅二十餘里九

月十九日翼長多隆阿由宿松率馬隊會同副將鮑超步隊至祝家塆一帶值賊匪分路出撲我兵亦四路迎敵營總薩林祿昌左右抄截正遇伏賊遙起薩林等率馬隊縱橫衝突殲斃騎馬悍賊多名餘賊四散奔逃我兵追殺斃賊又千餘名生擒長髮老賊五十餘名正法將涼亭河一帶賊壘十餘座全行平毀查點兵勇亦多

受傷俟查明分別辦理

同日邵燦庚長奏言疊據探報江南官兵圍攻

鎮江不日即可克復並准督臣何桂清函咨恐

逆匪鋌而走險囑於北路加意嚴防臣等查清

淮爲北路要津又爲揚營後路防堵更宜嚴密

淮安之南戴家灣雖有防兵尙嫌單薄擬將派

防山清交界之練勇移營淮安平橋地方扼守

運河兩岸並於要隘處所安設礮位派署淮海
道赫特赫訥候補道宋玉珂等督率幹練員弁
駐紮該處無分晝夜認真巡防並通飭沿河州
縣督率民團合力守禦其東路以泰州爲門戶
先經督臣飭派淮揚道郭沛霖會同防堵臣等
現亦札飭該道激勵官兵民勇同心捍衛如有
南路擊敗之賊竄至境內務卽實力堵截毋任

聞

偷越均奏入報

欽定勦平粵匪方略卷一百八十四

丁巳年

十月十六日

癸亥和春奏言據探洪逆因援師屢

挫調集江北逆黨並悉索金陵各偽館悍賊暨
居民鋪戶號稱數萬人聚屯石埠橋龍潭以至
下蜀街之西揚言攻撲高資援應鎮江見我兵
勢盛逡巡不前者已十餘日吳逆欲從沿江沙
洲一路添紮營壘接應外援而又慮高資兵力

甚厚難以偷越遂於九月二十一至二十五等
日東北兩門及甘露寺摩旗兩山各賊營先後
各出逆匪數百人分股攻撲總兵余萬清虎嵩
林等率領兵勇分投迎敵共計殲賊六百餘名
臣與張國樑許乃釗相商吳逆連日竄撲東南
各營者蓋欲分我兵勢而陰以全力注重高資
必須先爲之備張國樑遂馳赴該處相度形勢

又在七八擺渡之間運糧河之南添築營壘二座一面密飭水陸各營戒嚴以待該逆果於運糧河之北沙洲蘆葦叢中潛築三營緊對南岸卽經官兵開放槍礮隔河攻擊十月初一夜該逆又築礮臺一座安放礮向我營攻擊張國樑卽飭參將余兆青等由六擺渡進攻副將周天培等由黃泥橋進攻副將張玉良等由馬步

橋進攻副將馮子材等由煙墩山進攻另派遊
擊張永清等各帶兵勇及親軍小隊伏於潮黃
兵得勝勇兩營之中初二日張國樑率同副將
王浚等統帶銳師涉水過港直撲賊營礮臺余
兆青等伏兵齊出四面圍攻水師都司賴鎮海
亦於江邊連開大礮賊匪驚亂王浚揮軍奪壘
千總朱得勝等奮勇先登大隊蠶擁而上立將

礮臺一座蹋毀守臺逆匪殲斃無遺張國樑親督張玉良等涉過運河攻剿六擺渡賊營逆衆大潰張玉良等一擁而進卽將賊壘毀平共計斃賊五百餘名初三日張國樑督同王浚等帶領兵勇渡過運河攻擊蘆葦中賊營千總許世忠首先搶入賊壘朱得勝等奮勇繼進衆軍隨之該逆踰壘逃生官軍追擊掩殺前營逆黨又

復傾巢出拒我軍四面圍攻又毀賊壘一座約斃賊匪三四百名查有儘先千總許世忠血戰陣亡張國樑又於初四初五初六等日帶兵督夫在沙洲賊營之西添築堅壘二座直逼賊營並率將弁更番攻擊該逆亦拚死抵禦至今未退臣因見該逆麕聚高資他處賊營勢必空虛傳令東南各營於兵夫挖濠築牆之外仍復乘

便攻擊初四日虎嵩林督同遊擊王夢熊等由南路進攻摩旗山賊營恐虎頭山賊援又至復派副將魯占鼇等帶兵進攻以分賊勢臣又飭王浚等從摩旗山西面進攻冒險搶至濠邊將濠外木椿拔去大半我兵伏濠溝中遊擊多陞額被礮陣亡守備宋芝相等正欲乘勢搶入詎山下賊營突出千餘人來援我軍卽於山腰接

仗立斃賊匪數十名其勢稍卻有騎馬黃衣賊
目數人阻住各賊不能退走兵勇合力痛擊該
逆始行敗退臣查鎮逆久困圍城窮極思竄高
資爲水陸要區我師極意經營者在此此處不
通鎮賊卽無生路亦必無久踞之勢現雖江濱
賊壘尙未一律肅清而西路咽喉已塞決不至
有竄併之虞惟舍南趨北亦意中必有之事德

興阿大兵屯紮該逆自不敢踰揚而北西路樸
樹灣一帶可由儀徵西趨六合北犯天長臣等
復與德興阿等往返函商知己嚴爲之備臣又
密飭京口儀徵各營縣雇備船隻排列江邊多
張旗幟作爲疑兵使該逆不敢東西竄突設有
緩急可分兵渡江南北互援一切機宜仍與何
桂清隨時商推總期埽平高資克復鎮城然後

會攻金陵仰紆

聖主宵旰焦勞之至意所有打仗陣亡之卽選遊擊多
陞額千總許世忠應請

旨飭部從優議卹

和春又奏言據總兵李德麟稟稱九月初三日
東北風大作派都司黃廣泰等駛駕快蟹船直
攻泥汊賊壘該逆連開槍礮復於港口駛出賊

划數十隻上前迎拒我兵奮力攻剿擊沈數隻
逆匪轉舵回竄適上海又來礮划三十餘隻飛
駛衝下當飭黃廣泰等將各船分爲兩翼前後
夾擊轟沈十餘隻賊勢大敗溺水燒死者無算
隨揮令各軍進攻陸路賊營賊出大股來拒兵
勇奮力迎擊火器頻施燒燬賊卡三座該逆抵
死不退軍功吳培元等直衝賊隊刺倒執旗賊

目二名逆勢不支飛奔入巢兵勇追殺多名趕
至外濠環攻轟倒賊營內望樓二座共斃賊二
三百名又據水師總兵泊承陞等稟稱九月十
三日飭都司張瀚管帶金和泰各艇起程駛赴
高資一面率同將備各帶師船合幫齊進並督
同南岸各艇駛赴鎮江之釣魚臺一帶該逆見
我師直上兩岸紛紛開礮金和泰等船業已偏

近金山時北風漸大江溜湍激未能迎頂截進
隨令各艇駛赴瓜州龍王廟新河口一帶貼近
賊隄開礮轟斃賊匪多名現仍飭趕緊進剿以
冀肅清江面奏入

上諭內閣曰此次鎮江一帶陸路攻剿接仗六晝夜之
久斬馘千計水師復乘風轟擊賊勢已窮著和春等
嚴飭將士迅圖克復勿再延緩陣亡卽選遊擊多陞

額千總許世忠均著交部從優議卹

和春又奏言臣查直隸通永鎮總兵李志和年
逾七十精力就衰廣東南澳鎮總兵謝焜身弱
多病難以帶隊值此軍務喫緊未敢稍事遷就
相應請

旨將直隸通永鎮總兵李志和廣東南澳鎮總兵謝焜
一併原品休致奏入

上諭內閣曰直隸通永鎮總兵李志和廣東南澳鎮總兵謝焜均著以原品休致

同日晏端書奏言臣前因徽浙兩防喫重三衢兵勇不敷防勦函請督臣將檄調回閩之衢州鎮饒廷選舊部閩兵五百名暫留玉山防所旋經饒廷選咨准督臣以杉關等處兵勇甚單儻被逆股突犯憑何抵禦仍將前項閩兵折回飛

飭帶兵遊擊穆隆阿馳赴杉關防勦其玉山防
所卽由饒廷選另募漳勇備防又南陵婺源及
萬級嶺崇覺寺等處同時告警經和春調派兵
勇交都司閔步璜帶赴灣沚嗣因崇覺寺防所
兵力不敷復調赴崇防歸漳州鎮周天受調遣
又揚勝勇樹勇交把總鄭國泰等帶赴涇防歸
都司吳正熙派紮萬級嶺防守其二次調到各

路兵勇由南澳鎮總兵謝焜統領至甯當因南
陵賊退鎮江攻勦喫緊卽飭將江北綏勝勇折
回紅藍埠原防碣石鎮官兵折回白兔原防以
固句溧後路現准和春咨會碣石官兵已令謝
焜帶赴鎮江圍勦奏入報

十七日 甲子 德興阿翁同書奏言 臣等以逆首吳

如哮率衆北渡意圖冒死衝突不可不嚴爲之
備派總兵鞠殿華等護運水礮臺由三汊河直
抵四里鋪開放大礮正擊賊叢不知斃賊多寡
九月二十八日賊匪向西路竄出分爲兩股經
參領富明阿等帶領馬步各隊至土橋雙橋兩
處迎敵將賊擊回二十九日鞠殿華等仍分兩
路護運水礮臺前進東西兩岸賊巢各出賊匪

二三百名我軍開放大礮轟倒望樓一座擊塌城垛數處該逆未敢過濠我軍亦未能搶越臣等復飭各營輪流出隊見賊卽擊節據逃出難民供稱賊匪仍思乞援金陵由南岸遣黨接應臣等竊見和春軍營兵力甚厚而張國樑力扼高資聲威極壯又有賴鎮海所帶紅單艇師拖曾等船扼駐高資諸要隘知南岸賊援亦難竄

合惟自浦口以至焦山江面遼闊正宜節節嚴防又非獨高資一港爲目前之要因檄飭浦口觀音門土橋各水師嚴防賊箠賊船載米接濟並飭焦山水師嚴防瓜鎮之賊乘虛下竄旋據水師參將黃彬等稟稱九月二十七日有快船巡至天河口見港內藏匿賊船十餘隻黃彬商令都司彭常宣等分帶艇師駛前迎擊突有賊

船由觀音門竄出黃彬與彭常宣等合力圍攻賊船且拒且退黃彬見賊船飛棹遁逃急令小舸尾追甫至口內而岸上賊壘舉礮揮擊未便深入又據水師總兵周希濂稟報九月二十八日瞭見上河下關一帶大小賊船挂帆林立轉戢行駛當卽揮令各船起碇迎擊一面知會陸路總兵安勇等出隊會攻該鎮派遊擊楊冠春

帶領廣艇攻九湫洲遊擊王之敬帶領局艇攻南岸下關七里洲該鎮親督各艇師擊沈上游大賊船一隻截獲小礮船一隻賊匪溺死於江者無算楊冠春擊沈大樓船兩隻大礮船一隻焚燬小賊划四五隻擊塌九湫洲賊卡兩所適溫紹原飭派六合練勇前來開礮助戰彭常宜由下游觀音門派龍哨快船接應我師船攻撲

南岸擊倒七里洲瞭望臺一座焚燬賊划三隻
餘匪向葦叢奔逸又據水師總兵泊承陞陳世
忠稟報十月初二日陳世忠親督將弁由北岸
對準瓜州新河口一帶賊隄轟擊大礮復截赴
南岸攻剿龍窩泊承陞由南岸駛赴北岸攻剿
初四日擊沈瓜州新河口賊船一隻斃賊數名
並據守備賴鎮海稟報本月初一等日會剿鮎

魚套賊隄情形臣等仍飭賴鎮海力扼高資港口爲南軍助威連日探報金陵逆匪復由龍潭下蜀街等處下援已爲張國樑擊退而南岸迤西之石埠橋等處逆黨尙蠡屯蟻聚與六合儀徵僅隔一江日前賊援東下沿江焚掠據儀徵縣稟報南岸難民渡江覆溺相望臣等已飭妥爲安插兼防賊匪搶渡因飭水師總兵陳國泰

添撥紅單船三隻駛赴上游江面駐泊與參將
黃彬等所帶之船聯爲一氣卽有賊匪箠船竄
下無難截獲至文煜所募之勇業經派員接管
茲又分撥水礮臺二座運至沙頭江口與焦山
艇師聲勢相倚又添派練勇三百名赴沙頭江
岸防勦東路情形稍緩亦尙不至空虛刻下惟
防南岸大股賊匪掠船北渡臣等疊飭儀徵六

聞

合封江斷渡現又飭令悉將民船收入港內毋
許沿江散泊爲賊所掠其焦山水師經和春等
徑調十船該總兵陳世忠等早已如數派撥駛
赴高資與賴鎮海所帶之紅單等船隻聯檣駐
泊奏入報

十八日
乙丑官文都興阿胡林翼奏言楚省官軍

克復江西湖口後續接探報首逆石達開渡江
會集都昌鄱湖各賊盡踞景德鎮行止尙無定
向而賊目賴桂英等踞守彭澤實爲下游肘腋
之患臣官文等復飭水陸各軍急攻彭澤牽制
石逆以免回援金陵九月十七日李續賓將老
營留紮湖口同楊載福師船直抵彭澤縣境距
城五里有小孤山挺立江中逆衆於南北兩岸

修築石城環以深濠僅留一門一路曲繞而進
楊載福等商議先攻北岸僞城調巴克坦布等
馬隊由橫壩直趨小孤山北岸又派楊得武率
湘凱各營由湖口縣直趨小孤山南岸二十一
日楊載福留都司楊明萬礮船轟北岸僞城自
率大隊戰船向舊城排礮一周卽往下游進發
李續賓飭各勇夫於距僞城三四里多修營壘

佯作長圍之勢自率親兵梭巡城外拔取木椿
忽該逆出隊抗拒我軍奮勇迎戰賊匪退奔我
軍復佯退誘之該逆又出數千人追撲李續賓
令親兵排陣以待復密傳馬隊從賊後邀擊該
逆大敗不能回城我軍掩追數十里至吉水溝
適遇楊載福戰船橫截轟擊殲斃賊千數百名
餘賊向望江竄逃楊載福率師直逼望江縣境

登岸搜剿敗賊斬擒殆盡卽駛下安慶維時彭澤縣城內之賊紛紛竄逃被楊明萬率勇追殺斃賊無數二十二日李續賓與楊明萬以礮船轟擊南岸僞城陸勇與馬隊亦會合輪攻至四更時見城中火起知賊已遁當飭馬步隊窮追三十餘里沿途斃賊數百名小孤山伏賊閉門堅守我軍誘令下山斬之此二十一二等日攻

克彭澤縣並拔其兩岸僞城及勦除小孤山賊
壘之實在情形也臣等查楊載福率師進規安
慶已有直搗金陵之望現在潯城之圍功虧一
簣卽當設計勦除臣都興阿因皖逆尙熾斬黃
路路可通楚境北岸勦守不容鬆勁現仍率馬
步各軍由宿太節節埽蕩相機而進以期肅清
皖北專意東征奏入

上諭內閣曰此次楚北官軍水陸進剿將彭澤縣城收復並拔其兩岸僞城剿除小孤山賊壘辦理甚爲得手著官文等乘此聲威激勵將士迅克九江進攻安慶並由宿太節節掃蕩俛北一律肅清所有在事出力員弁並陣亡丁勇著官文等查明具奏候朕施恩

二十一日 戊辰 胡林翼奏言前奉

諭旨胡林翼著將省城公事趕緊料理卽行馳赴九江
與都興阿等會辦勦賊事宜等因欽此跪讀之下曷
勝感奮惟全師出境必使軍無返顧之虞乃得
銳意長驅節節攻勦不僅圖潯城之克復已也
查九江城賊岌岌孤立雖米糧尙足而援絕勢
窮現又開濠兩重匪竄無路李續賓楊載福調
度運籌早已豫操勝算萬無疏虞斟酌情形暫

可不必前往且潯城旣下必有擊散之賊紛紛
上竄湖北大軍移動門戶堪虞接准勝保八百
里咨稱安徽獨山軍營失利西面緊接湖北之
羅田麻城囑卽迅速防剿查羅田麻城均在九
江之上四百餘里亦在宿松太湖以上三四百
里大兵盡駐下游賊若間道橫撲則德安安陸
一帶亦必驚擾現已派兵前往堵剿如有警急

應再籌撥兵勇以昭慎重臣之步軍分防襄陽及蘄黃興國各營一時尙難抽調又瑞州克復王鑫劉騰鴻先後殞謝臨江吉安之師乍前乍卻勝敗不常查臨江距瑞州百餘里距湖北之通城崇陽亦祇數百里江西內地被賊竄擾者尙有六府不僅與鄂省唇齒相依兼與湖南邊界處處相通是上游南岸亦屬空虛設有不備

則東下之師首尾受敵不可不慮又兵之所向
餉項宜籌臣現辦牙帖釐金等項漸有起色雖
計每年所入僅敷大營得半之餉尙不至十分
飢困惟章程初經釐定必須試行一年方能覈
實又鄂省漕糧弊竇太深今則兵燹餘生脂膏
已竭更不堪其朘削臣於九月初一日從九江
回省後卽遴委道府大員澈底清查逐縣刪減

上下衙門陋規浮費一概革除現當立法之初亦須切實整頓又臣本年馳赴下游督勦隨處察看地勢於邊界要隘地方修築礮樓以資防守燒礮砌石亦須數月畢工以上各事宜爲鄂省切要之急務亦與東征之師牽涉關繫潯城克復後東南全局節節可圖時固不可暫失而事必策其萬全臣應俟九江攻克再行前往會

商似與地方軍務均有裨益奏入

上命軍機大臣傳諭胡林翼曰前因胡林翼奏請飭曾國藩赴江西統率水師當諭令該撫將省城公事料理馳赴九江與都興阿等會辦茲據奏稱九江賊勢已窮李續賓等辦理已有把握暫可不必前往等語潯城一經克復敗散餘匪上竄堪虞自應嚴密設防使我兵無後顧之虞然後節節進剿方爲計出萬全

至籌畫兵餉釐剔清弊擇要設防皆係目前切要之
務該撫身任地方責無旁貸著卽逐件籌辦暫時毋
庸前赴九江所有攻勦事宜現有都興阿楊載福李
續賓等水陸並進當可迅速奏功俟克復九江後胡
林翼再行察看情形酌量進止

二十二日己巳晏端書奏言查婺源克復後全境

肅清而浮梁樂平一帶賊蹤未遠急須布置周

密臣前經咨會皖南鎮總兵江長貴將葵防事宜妥爲籌辦並因徽甯兵勇不敷分派復咨商張芾於浙師內酌量添調並撥歸徽營台隊駐紮俾得事權歸一現在江長貴已赴婺源察勘地勢擇要紮營並准張芾指調浙兵赴葵派防臣當札飭參將沈榮海等將帶駐四安等處各標官兵一千五百餘名前赴徽營聽候張芾派

聞

委大員統領調遣以資防勦此外尙有不敷卽
由江長貴酌募壯勇派撥協防以期有備無患
奏八報

同日

上命軍機大臣傳諭德興阿和春曰連日據德興阿和
春奏報瓜州鎮江疊獲大勝情形兩處逆匪窮蹙南

北兩岸均已布置周密一旦攻克鎮江該匪逃竄高
資西路已斷而德興阿等嚴扼北路亦斷不慮其疏
失惟念揚州西路自樸樹灣直達儀徵六合江岸綿
長上下游皆須兼顧德興阿營中惟翁同書以文員
幫辦設有緩急分兵統帶尙恐乏人現在江南軍營
不少帶兵大員何人堪勝幫辦之任和春必能知悉
著卽詳加選擇酌保一員一面奏聞一面先行飭赴

江北軍營幫同德興阿督辦軍務俟奏到日再行明
降諭旨和春不得以無員可保一奏塞責務與德興
阿通籌合勦無分畛域儻瓜州先克卽可進攻江浦
牽制金陵賊勢或鎮江先克而該逆有北竄之謀則
南路追襲之兵卽當迅速渡江與北路兵互相援應
總在該大臣等統籌大局計出萬全朕將拭目以待
捷音之至也

二十四日辛未福興奏言景德鎮股匪竄踞安仁

縣城後糾約金谿瀘溪逆匪三萬餘衆分犯貴
溪知縣李元度迎勦之軍先勝後敗該逆遂撲
近北門延至迤東一面勢甚猖獗我軍回城固
守適協和營一隊趕到賊遂驚卻大股仍分踞
附近貴城十里內外東北面則路路可達弋陽
臣卽於九月十八日拔營前進行至弋陽蓮湖

坂地方探悉北路之崇岡嶺一帶已有賊蹤當
卽就地扼紮堵其來路隘口一面派撥兵勇紮
於貴溪東北水門鋪毛塘鋪等處爲貴邑犄角
之勢兼扼其由西北四塘岡內犯之路其四塘
岡距水門鋪蓮湖坂均不甚遠該逆屢來窺伺
疊經巡哨官兵擊回貴溪環城數十里逆勢橫
梗自十九至二十三日天雨不止守城之軍分

段站牆多備滾木擣石以待二十四日僞楊國
宗率黨四五千入分路來犯東北門我軍猝發
大礮轟斃三十餘賊賊復改犯東門李元度派
壯士三百餘人從東門潛出合衝賊陣賊卽紛
紛奔潰本月初二日夜馮日坤等帶領各軍由
四塘岡小路繞道前進城內李元度亦商同熊
應文密派弁勇從閒道而往同襲賊營該逆正

在搬運物件我軍突放噴筒火箭逆黨踉蹌竄
逃當燒燬賊壘四座各營派隊往追徧溺數百
名截殺四百餘名圖克唐阿等復四路搜剿追
至夏家嶺地方餘匪過河淹斃者又數百名安
仁城內之賊知貴溪大股潰敗卽於初三夜陸
續渡河分竄鄧家埠何坊一路趨向金谿而去
南路耳口寨上清一帶續圖北竄之匪先經團

總姚步瀛扼要堵剿亦未能與此股合擾安貴
現在後路景鎮仍有大股屯集樂平一帶情形
亦頗喫重訊據擒賊供係僞楊國宗新國宗七
國宗分統逆衆前來意欲攻破貴溪直趨廣信
以入浙省使徽甯腹背受敵與江皖等處賊蹤
更可聯絡一氣今幸託

天威得以轉危爲安保全東路大局所有節次剿賊各

該營文武員弁兵勇及協同守城地方官紳尙
有微勞合無仰懇

天恩准予併案擇尤保獎再同知銜降補知縣李元度
守城擊賊深合機宜應請

旨開復同知原官並

賞加知府銜貴溪縣廩生姚步瀛倡辦團練頗爲認真

應請

旨以訓導歸部儘先選用奏入

上諭內閣曰江西景德鎮股匪自竄踞安仁縣城後糾約三萬餘衆分犯貴溪經福興派令知縣李元度等帶兵攻勦疊獲勝仗安仁城內之賊聞風分竄其上清一帶續圖上竄之匪先經團總姚步瀛糾練堵勦未能與貴溪安仁竄匪會合辦理尙屬得手同知銜降補知縣李元度著開復同知原官並賞加知府銜

廩生姚步瀛著以訓導儘先選用其餘在事出力文武員弁兵勇著准其併案擇尤保奏

二十八日乙亥德興阿翁同書奏言十月十二日

參領富明阿等帶領馬步兵勇前赴雙橋修路進剿正遇瓜州賊匪突出相持鏖戰富明阿帶隊援應擊斃賊匪二十餘名十三日富明阿率參將王巨孝等由軍營進攻營總常壽等由高

橋進攻連撲賊壘數次濠闊水深未能得手是
日總兵鞠殿華等護運水礮臺由三汊河赴四
里鋪進攻力戰良久亦以賊礮如雨不能越濠
據陸續逃出難民供稱賊糧不敷一月之食似
屬可信二十一日臣德興阿親赴土橋督攻其
三汊河各營仍前護運大礮進剿詎意東西兩
岸賊匪出巢抗拒我軍奮勇迎擊殲賊甚多臣

等以南岸賊匪屬聚龍潭石埠橋一帶屢圖搶掠民船因飭儀徵六合封江斷渡嚴爲之備據水陸探報觀音門內有賊船數十隻大小木鐸二座卽圖下竄並聞南岸賊匪欲掠小船運米接濟瓜鎮現已飛飭陳國泰等分帶戰船節節截剿毋令片帆得渡奏入報